



NOBILISSIMO ILLUSTRISSIMOQUE VIRO,

D. D. ANTONIO

M E G R E T,

EQUITI, BARONI DE TELIA ET CAPELLANIA,
&c. Regi à Consiliis, Libellorum Supplicum in Domo Regiâ
Magistro, Rei Judiciariæ, Politicæ & Ærariæ, in Navarrâ,
Benearniâ, & Ausciorum Provinciâ Præfecto, Benignissimoque
Patrono,

T H E S E S

ANATOMICAS ET CHIRURGICAS,

*Vovet, offert & consecrat obsequentissimus, CLAUDIUS-
GUILLELMUS BEAUPREAU, Senonensis, Aritum
Liberalium in almâ Universitate Parisiensi Magister, &
Chirurgiæ Candidatus.*



D. O. M.
T H E S E S
ANATOMICÆ ET CHIRURGICÆ.



ELEGANTIOR vultûs forma, venustas oris, vocis & loquelæ robur ac lepores, præstantissimo digestionis opere in inchoando momentum validius, in eodem perficiendo levamen admodum potens; commoda sanè inter vitæ jucundioris fontes non immeritò referenda! hæc porro singulis, dentium præsertim adhibito munere, veluti totidem beneficia, jugiter impertiri conatur natura, provida mater; in eadem conservanda, aut, viciatâ dentium organicâ dispositione, restituenda, sedulo incumbit Chirurgia, naturæ ars amica. Utriusque opera scrutari, ut amœnum, sic utile, alterum præinde, ipsius Dentis consultò elaborantem & ordinantem, alteram verò, dentium hostem infensissimum, Cariem quippè, eâdem mente præcaventem, aut debellantem, sequemur.

E X A N A T O M I A.

DENTES, ossa minora, firmissima (a), omnibus facillè cognita, mirabilem offerunt genesim. Sedes ipsis in utrâque maxillâ, superiori scilicet & inferiori, adscripta fuit. Illa tredecim ossibus, quorum duo majora, inferiora & anteriora, dentibus hospitium præbent; hæc

(a) In sceletis mole majoribus ossa in pulverem facillè convertenda reperiebantur, dentes tamen adhuc firmissimi. Diari. Abbatis Nazari. an. 1669 & 1676.

In sceletto cujusdam mulieris Supiot nomine, cujus ossa emollita fuerant per vitam, dentes, præ cæteris, ossèâ firmitate donabantur. A& Acad. R. Sc. an. 1753.

verò osse duplici in junioribus, & unico in adultis, coalescit. Ita se se habent ossa maxillaria ut, licet figuræ admodum irregularis, tamen sibi invicem coadunata, exhibeant, per partem inferiorem, quamdam fornicis speciem processu arcuato circumscriptam. Fornix majorem Palati constituit partem, & ideò Palatina; processus cavitates exiguas, ad invicem appositas, alveolos quippè continet, & ideò Alveolaris nuncupatur. Maxilla inferior arcus figuram utcumquè refert; in orâ ipsius superiore cavitates pariter seu alveoli reperiuntur; undè Alveolaris etiam appellatur. Duæ laminulæ compactæ horumce limborum, vel à primis ossificationis temporibus, à se invicem recedunt, & spatia veluti totidem casulas inter se relinquunt. Unamquamque inter casulam stat paries osseus & perpendicularis. Supra huncce alveolorum ordinem, in maxillâ inferiore, & infra in inferiore, seriem alteram ejusmodi cavitatum facili negotio conspiciere est. Tertia insuper in quibusdam subjectis observatur. Superiorem casulam separat ab inferiore septum osseum, transversè positum. Alveolorum superficiem internam investiant periossteum & lamina quædam cartilaginea; intra cujus civitatem vesicula membranacea continetur, liquore mucoso, crystallinum humorem consistentiâ & colore paulatim æmulante, referta. Liquor ille in substantiam osseam, successu temporis & calore nativo, convertitur; ita tamen ut neque cartilaginea, neque sub alterius cujuscumque substantiæ formâ, appareat (b): propè septimum graviditatis mensem, superficies ipsius externa magis ac magis albescit & durescit; sicque brevi substantiam exhibet cunctis ossibus firmiorem, compositam filamentis tam exiguis & inter se tam accuratè junctis, ut superficiem referant politam, à marmore levigato non prorsus absimilem, Encausti nomine insignitam (c); quod quidem encaustum substantiæ osseæ incrementum, per partem marginis maxillæ viciniorem impedit, & per oppositam, quam non complectitur, permittit; unde versus unam partem crecendo, radicem efformat, quæ resistantiam in fundo alveoli majorem reperiens, extrâ pellit partem encausto munitam, quousquè cartilaginem superappositam & minùs resistantem attenuet, deleat, gingivam perforet; sed illud fieri non potest quin illa expansio ossea, seu radix, crassitie minuat, ratione compressionis superandæ, quin proindè gracilior evadat.

JAM triplex in unoquoque dente distinguenda venit pars, scilicet exterior, alveolum exsuperans, quæ partim encausticâ, partim osseâ componitur substantiâ, & Corpus, seu Corona; interior, idest alveolo infixâ, quæ substantiâ constat osseâ, periossteo circumcinctâ, continente cavitatem interiorem, usquè ad coronam penetrantem, periossteo pari-

(b) Dissertat. clarif. D. de la Sone, nunc augustissimæ Galliarum Reginæ Archiat. A&A. Acad. R. Sc. an. 1752.

(c) Observ. D. de la Hire filii. A&A. Acad. R. Sc. an. 1699. Swammerdam, Biblioth. natur. in collectione Academicâ, tom. 5. p. 89.

ter vestitam, & Radix; tandem linea depressa, corpus à radice separans, & Collum dicitur. Ad radicem dentium utriusque maxillæ appellit funiculus vascularis, nervo, arteriâ & venâ conflat; foramen in extremitate radice posuit subit, & per totum periosteum internum, imò & per substantiam osseam distribuitur; unde sensationis, circulationis, augmenti & nutritionis, dentes facili concipiuntur capaces. Nervus à quinto pari, & parte durâ septimi; arteria à Carotide externâ oritur, vena in jugularem externam degurgitatur; unde statuitur sympathia inter dentes & totum caput, imò inter ipsos & totum corpus, præcipue nervorum operâ (d).

DENTES, licet iisdem efformati substantiis, tamen nec eadem figurâ gaudent, nec eodem tempore prodeunt. Ut plurimum, circa quintum, sextum, septimum, vel octavum à nativitate mensem, duo dentes latitudine majori quam crassitie pollentes, convexi leviter à parte anteriori, & concavi à posteriori, secantes ex limbo radice opposito, Incisores idcirco nuncupati, prodeunt in parte anteriori maxillæ inferioris; paulò mox, horum ce congeneres duo in maxillâ superiori apparent; deinde duo à lateribus incisorum inferiorum exurgunt, & subsequenter duo à lateribus superiorum; unde octo incisores efformantur. Circa mensem undecimum vel duodecimum, duo dentes crassiores, obtusi, formam dentium caninorum æmulantes, Canini idcirco vocati, in maxillâ inferiori sese extollunt; post alterius mensis intervallum, oriuntur ferè simul duo canini superiores; ubi notandum, caninos quatuor haudrarò in lucem non edi, nisi post molares anteriores. Quarto decimo, vel quinto decimo mense, duo dentes crassiores, in obtusum apicem, ut plurimum duplicem, desinentes, in maxillâ inferiori; & subindè, totidem in superiori, locum obtinent. Alii duo, fere ejusdem figuræ & voluminis, in maxillâ inferiore; totidemque in superiore, juxta mensem vigesimum quartum, dantur foras. Novi quatuor, crassitie & volumine majores, apicem quadruplicem sæpè sæpius referentes, ponè alios, anno quinto, aut sexto, sese exhibent; duo scilicet in utrâque maxillâ. Sequuntur quatuor alii posteriores, anno undecimo vel duo decimo: tandem quatuor ultimi, aliquandò per vigesimum, aut etiam ætatem provectiorem, munus obeunt; quâ de causâ, Moderatores, vel Sapientiæ dentes, vocantur. Viginti quatuor posteriores, modò descripti, Molares audiunt, ex eo quod, figurâ & usu, molam quodammodo æmulantur. Dividi solent in octo minores, totidemque majores, nec non quatuor tardiores.

Non prætermittendum, dentes incisores, caninos, molares minores necnon anteriores, unicâ tantum inniti radice; molares verò posteriores duplici, triplici & aliquandò quadruplici; ultimos tandem unicâ dun-

(d) Commentar. Physic. de anatom. Heisteri. art. de motibus sympathicis.

taxat, sed crassiori. Radices illæ sunt modò rectæ, modò curvæ; hîc à se invicem recedunt, illic ad se approximantur ad apicem (e). Ex quibus differentiis, minorem majoremve difficultatem in extractione, & minora vel majora post extractionem accidentia liquet exurgere.

TRIGINTA - DUOS dentes cavitatem oris circumscribere in adultis, sequitur ex descriptione præmissâ. Idem tamen non existebant omnes in infantibus; viginti enim priores, lactei nomine, decidere incipiunt à septimo anno, per partem oris anteriorem, secundum progressionem ador-
rûs; & prout decidunt, aliis ejusdem formæ & figuræ, sed majoribus, suppleantur. Sic remanent dentes in ore usquè ad ætatem provec-
tam, dummodò nullâ labe, nullove accidente infligantur; tandem seriùs ociùsve delabuntur, & quam plurimùm successores non habent, propter deficientes œconomîæ animalis vires; quæ tamen si adhuc remaneant, jam nova elucescit dentium series, & mirantes exclamant spectatores senioreni repuerascere (f). Triplex ille dentium exitus dicitur Dentitio; quæ in primariam, secundariam, vulgò dividitur. In tertiam insuper dividi potest.

DENTES, per unumquodque ætatis stadium, firmantur in alveolis non solum ope funiculi vascularis, ad radicem appellentis, sed & ope constrictionis accuratæ ex parte alveolorum, necnon ope filamentorum à gingivis in ipsammet dentis substantiam, propè collum, insertorum. Quâ dispositione, omnis impeditur aëris, & aliorum corporum, in radicem dentium contactus dolorificus.

GINGIVÆ textum offerunt fibrosum, firmum, elasticum, nervis & vasculis perunctum, membrana innata oris vestitum, alveolis mediante periosteo adhaerentem, & intervalla dentium, strictioris connexionis causâ, penetrantem.

E X C H I R U R G I A.

QUANTACUMQUE in dentibus efformandis, conservandis & renovandis, elucescat Mechanismi sapientia, eandem nihilo-
minus cum cæteris corporis humani partibus sortem dividunt; intùs &

(e) Vid. Varias dentium figuras, apprimè delineatas, in præclarâ tabul. Osteolog. editione Paris. promulgatâ, an. 1759. Author. M. Sue, Anatomes in Reg. Chirurg. Scholis Professore, &c. part. 2. Tab. V. VI. IX. & præsertim X.

(f) Inter alia hujusce phænomeni exempla, duo extant insignia in Ephemerid. nat. cur. dec. 2. obs. 15. Duo viri seniores novum & duplicem dentium albidissimorum ordinem singuli recuperarunt, anno ætatis illorum 118; doloribus capitis, maxillarum, &c. tunc vehementer affecti.

(5)

foràs modò latentes, modò detectos coguntur hostes agnoscere (g). Digestiones pravæ, cacochymia, lues variæ, plethora à graviditate, aliæve quæcumque causâ oriunda, inflammatio periostei, tum interni, tum externi, suppuratio subsequens; masticatio durorum, alimentorum frigidiorum, calidiorum, salforum, saccharo conditorum, aut ipsius sacchari (h), acidorum, acriorum, usus frequens & immoderatus; eorumdem inter dentes perseverans præsentia; contactus aëris metallica corpuscula vehentis, aut etiam puri, in ipsammet substantiam osseam encausto spoliata agentis; & quasi hæc non sufficerent, sæpiùs cariei destructores ipsam producant. Lima, acida, pulverum usus subsequens & frequentior, incensum, &c. Absque cautelâ adhibita, minuunt encaustum, delent, &, cum reparari nequeat, ipsum os deturpant.

Ex harumce causarum vario actionis gradu, varia nascitur læsionis differentia. Vel enim encaustum partim tollitur, & est erosio; vel omninò, & brevi adest alteratio in osse; vel alteratio ipsamet ossis fibras afficit, solutionem illarum continuitatis infert, & tunc adest erosio in osse, seu Caries; quæquidem, vel superficiem siccam, & est caries sicca; vel humore tenui, foetido, madidam præsefert, & est caries humida; alterutra, vel usque in cavum radices penetrat, vel non, & tunc completa, vel incompleta dici potest; extrinsecus conspicitur, vel non, & tunc interna, vel externa habetur.

DIVERSÆ illæ cariei species, vel unum, vel plures lædere possunt dentes, absquæ aliis accidentibus, aut morbis concomitantibus, & tunc simplex, vel composita reputatur; aut ipsius dentis fracturâ, alveoli carie, exostosi, epulide, parulide, hæmorrhagiâ, dolore nimio, fluxione, febre, capitis doloribus, ophthalmiâ, glandularum ingurgitatione, abscessu, delirio, &c. seorsim aut simul, minori majorive numero vigentibus, stipatur, & est caries complicata.

SINGULAS cariei species per tactum, visum, & præsentiam circumstantiarum modò enumeratarum præsertim agnosces. Quando scilicet opè digiti, specilli, aut oculi, detegitur punctum cavum, asperum, impressionem digitorum, aut specilli, absquæ dolore non patiens; quibus signis addi

(g) Vid. quatuor disputation. propositas in Argentoratensium Universitate, à Melchiore Sebizio. M. D. & Prot. Comite Palatino Cæsareo, &c. an. 1644.

(h) Saccharum inficere dentes, non solum propriâ virtute, sed etiam propter liquorum & solidorum peculiarem dispositionem, constat ex observatis quæ referuntur in materiâ medicâ, D. Geoffroi. Cap. de Saccharo. Plures nimirum viri ad annum provectiorem pervenerunt, & dentibus albidis, admodum sanis, potiti fuerunt; licet frequentiori & majori copiâ Sacchari, per vitæ cursum, usi fuerint, Idem de aliis causis dicendum.

possunt, licet æquivocâ, foetor oris, vacillatio dentis, gingivæ ambiētis excreſcentia, ſuppuratio, impoſſibilitas ſuſtinendi abſquē dolore corpora calida, frigida, & contactum validiorem corporis duri, aut maſticationem ſolidorum.

SYMPTOMATUM & accidentium ſuprà expoſitorum ratio deſumitur ab ipſâmet cariei naturâ & cauſis, ſtructurâ dentis, & connexione ipſius cum cæteris partibus.

OMNIS cariei ſpecies malum omen præ ſe fert; eò tamen pejus quò altior eſt & antiquior, quò madidior, quò plures inficit dentes, quò magis recedit à ſuperficie coronæ, & magis accedit ad partes laterales ac collum, quò frequentiori accidentium numero ſtipatur, & interiorem malignioremve cauſam agnoſcit. Periculoſior etiam dentium molarium in utrâque maxillâ caries; cum enim majorem à lateribus exhibeant ſuperficiem, cariei majorem anſam præbent, & factam faciliùs tegunt; cum inſuper plurimis donentur radicibus, ſubſtantiæ ſpongioſæ majori copiâ incluſis, caries faciliùs afficere poteſt alveolum. Peſſima de carie octo molarium anteriorum maxillæ ſuperioris ferenda prognofis, cum enim ſinûs maxillaris cavitatem vicini legant, caries parietem inferiorem afficere & corrodere poteſt, gravioraque ſubindè producere.

CARIEM ejusque ſequelas vitare qui cupierit, cauſas ſedulò arceat, nec exteriora ſimul omittat auxilia. Quotidiè dentes vino aut aquâ purâ, à paſtu, abluere; dentifcalpio minori ſordes dentium intervalla occupantes auferre; linguam, jejuno ventriculo, detergere; identidem medicamenta dentifricia adhibere; cruſtas aut tartarum dentium ſcalpro dentali leviter radere & reſolvere: gingivæ dentesque poſtea ſorore curct.

Si neglectâ prophylaxi, aut incaſſum adhibitâ propter vitium prædominans, caſumve fracturæ &c. caries reiſpâ advenerit; tunc cauſam attentè conſideret Chirurgus, & quantum in ſe eſt, arcere ſtudeat; cariei indoles deindè agnoſcatur. Si ſiccâ ſeſe habeat, ſuperficies ipſius ruginâ, aut limâ, leviter detergenda, cavendo ne deleatur cruſta protectrix, quæ actionem corporum exteriorum in ſubſtantiâ oſſeam dentis impedit. Si verò humida & dolorifica ſit, tunc olea eſſentialia guayaci, cinnamomi, caryophyllorum, &c. goſſipio mediante, in cavitatem immittenda; & horum uſus uſquē ad perfectam cruſtæ efformationem, doloriſque abſentiam repetendus. Cauterium actuale oleis eſſentialibus præmitti poteſt, ut cruſta citiùs efformetur; ſed uſus cauterii omnibus dentibus non competit. In carie molarium majorum, altiùs penetrante, cauterium non agens in omnes ramos quibus innituntur illi dentes, viviorem relinquit dolorem ex parte ramorum non cauteriſatorum, & proindè debet rejici. Non idem tamen de inciſoribus, caninis, & molaribus, qui unicâ dantur radice,

Ut ut sit, casus adest in quo omnibus dentibus cauterium applicari potest; nimirum quando coronæ dentium usu deteruntur, & dolorem concipiunt ex contactu corporum exteriorum; quam operationem felici cum successu celebravimus.

MEDICAMENTIS, ferro, aut igne, adhibitis; cavum cariei succedens idoneâ impletur materie, ne præsentia aëris, salivæ & alimentorum, recrudescat caries. Folia auri, argenti, plumbique, ad id accommodantur, & ope instrumenti, Plumbi Ductoris nomine, introductas, tam accuratè applicantur, ut ne vel minima pars exsuperet dentis superficiem, & ne vel minima remaneat in eadem cavitas. Quæquidem agendi methodus, quamvis palliativa dici debeat, tamen aliquando ita prosperum edit effectum, ut dentem conservet per plurimos annos. Sed non omnibus fors eadem; aliquando enim dolor urget; tunc plumbum perforare juvat, quia inter ipsum & dentem latere potest humor ichorosus, aut purulentus, cavitatem implens, & per foramen eliminandus. Haud infrequenter pus viam sibi aperit propè extremitatem radices, fluit per alveolum, gingivam perforat, & faciliè exsiccat, cum levamine & fugâ doloris.

URGENTE dolore, ad medicamenta, pro re natâ, recurrendum, qualia sunt guttulæ anodynæ, olea essentialia, masticatoria, emplastrum odontalgicum, fumus hyosciami ope infundibuli denti applicatus, venæ sectio, balnea pedum, vesicantia, lobuli auricularis perforatio, gingivarum sectio, dentis terebratio usque ad nervum, ut destruat (operatio dolorifica nimium, sæpius infausta, & extractioni inferior); quæ si non succedant, ad nervi separationem à dente progrediendum. Hæc autem obtinetur, vel per operationem à recentioribus excogitatam, luxationem scilicet, quæ fit dejiciendo radicem ad latus, eo modo ut rumpatur nervus, & dentis non omnino exeat ab alveolo; & competit denti carie leviter affecto; vel per operationem ab ipsomet Æsculapio excogitam & celebratam, dentis scilicet perfectam evulsionem, quæ sicut & antiquior, sic & sæpius est summa therapeia. Porro ad utramque illam operationem exequendam, instrumenta duplicis generis agnoscuntur, naturalia, quæ sunt digiti, & arte facta, qualia sunt aurea, ferrea, chalybea; & quanta horumce multitudo! Forcipes, denticulæ, pelicani, impulsoria, rostrum corvi, rizagra, clavës, vectis sub formâ lanceæ, tanquam præcipua annumerantur. Priorum species valde multiplicatæ sunt. Cæterum electio illorum, à situ, figurâ, volumine, crassitie intrinsecâ, & adhæsione dentis pendet.

QUODCUMQUE adhibeatur instrumentum, æger situm idoneum obtinere debet. Tùm Chirurgus unâ manu labia remover, maxillam firmat, dùm alterâ instrumento armatâ collum dentis corripit, ad latus dejicit, & evellit. Extracto dente, gingiva digitis comprimi debet, ut

paries alveoli, qui sæpè sæpius inter evulsionem frangitur, in statum naturalem reponatur, & gingiva pristinum tonum facilius recuperet. Hæmorrhagiam subsequenter non subito comprimere est, sed tantum post sanguinis effluxum, ut partes vicinæ degurgitentur, & vitetur inflammatio, &c. Hæmorrhagiâ non sistente, ad stiptica, compressionem, aut etiam ignem, recurrendum.

Non semper sufficit dentem extrahere; varias complicationes curare, Chirurgo nonnunquam superest. Singularum cura dissertationem nimis amplam requirit, alibi suscipiendam.

DENS extractus, accuratè expurgatus, & idoneâ materie repletus, si leviter affectus fuerit, reponatur in alveolum; si è contrâ carie majori labefactus sit, tunc dens ex ore alieno extractus locum occupet. A repositione tamen molarium majorum abstinendum censemus, quia parietes ossei & spongiosi, casulas illorum radicum separantes, per extractionem ut plurimum disrumpuntur, & fiunt impares suscipiendis, & comprimendis radicibus noviter insitis. Si Dens ex ore alieno extractus & repositus adhæSIONem, sicut fit in senibus & scorbuticis, non facilè contrahit; tunc dens fabrefactus substitui, & ope fili aurei, aut setæ sericeæ, contineri debet. Quo in casu dentis cujuscumque radix à corpore separatur nulloque dolore stipatur; tunc radici applicetur corona fabrefacta, & ope cardinis infixâ retineatur. Hæc media toties admoveri possunt, quoties deficiunt dentes. Imò, omnibus delapsis, duplicem dentium seriem apponere docet ars semper vigilans.

de Sen
HAS THESES, DEO JUVANTE, & Præside M. STEPHANO-
PETRO LE LAUMIER, Artium & Chirurgia Magistro, tueri cona-
bitur CLAUDIUS-GUILLELMUS BEAUPRÉ II. Senonensis, Arciani
Liberatum in alimâ Universitate Parisiensi Magister, Chirurgia Candi-
datus; Die Sabbati ¹² Julii, à sesqui-secundâ post meridiem ad sep-
timam, anno R. S. H. 1760.

PARISIIS,
IN REGIIS CHIRURGORUM SCHOLIS,
PRO ACTU PUBLICO ET MAGISTERII LAUREA.

Typis KNAPPEN, infra Pontem Sancti Michaëlis, sub Signo Boni Protectoris.